

Aberastasunaren zati gero eta txikiagoa doa zerbitzu publikoetara eta gizarte-prestazioetara

Eusko Jaurlaritzaren 2018rako Aurrekontuen balorazioa

2017ko azaroaren 13a

ELA
EUSKAL SINDIKATUA

0- AURKEZPENA

Eusko Jaurlaritzaren 2018rako aurrekontu-proiektua azken urteetako aurrekontu murriztaileen ildo beretik doa.

Aurreko ekitaldietan hori justifikatzeko esaten zen diru-bilketa ez zela nahikoa. Alabaina, jakina da EAEko ogasunen diru-bilketaren bilakaera espero baino hobea dela oraingoz. Zehazki, 2017rako diru-bilketaren aurreikuspen eguneratua aurrekontuak egin zirenean baino ia 900 milioi euro handiagoa da (diru-sarreraren atala zehatzago aztertuko dugu aurrerago).

Diru-bilketa handiagoa, orain arteko logikari jarraituz gero, aurrekontuetara diru gehiago bideratzeko baliatu beharko litzateke, zerbitzu publikoen kalitate hobetu eta gizarte-prestazioen zenbatekoa gehitzeko.

Dena dela, 2018ko aurrekontu-proiektuarekin hori ez da betetzen; aitzitik, aurrekontuak hazkunde urria izango du. Benetan aberastasunaren zati gero eta txikiagoa bideratzen da oinarrizko beharrizan sozial hazkorrak -osasuna, hezkuntza, etxebititza edota gizarte-prestazioak- osatzera.

Beraz, 2018ko aurrekontu-proiektua medio gero eta handiagoa da defizita beharrizan sozial horien eta gobernuaren politikak benetan estaltzen dutenaren artean.

I- RAJOYREKIN HITZARTUTAKO GASTU-ARAU MURRIZTAILEAK BALDINTZATUTAKO AURREKONTUA

Eusko Jaurlaritzak onartu egin ditu:

- 2011ko uda betean erabaki zen Konstituzioaren erreforma azkarra: Orduan Zapateroren gobernuak eta PPK adostu zuten Konstituzioaren 135. artikulua aldatzea zorraren ordaina izan zedin instituzio guztien lehentasuna, aurrekontuko beste sail batzuren kaltetan, esaterako osasuna edota hezkuntza.
- Erreforma gauzatzeko 2012ko apirilean Aurrekontu-Egonkortasun eta Finantza-Iraunkortasun Legea ezarri zen, zeina Konstituzioaren erreforma baino are gogorragoa den: Lege honek espainiar gobernuari ahalmena ematen dio erakunde guztien defizit publiko maila finkatzeko (baita Eusko Jaurlaritzarena, Nafarroako Gobernuarena eta Foru Aldundiena ere), eta hurrengo urteetan instituzio guztiek izan dezaketen gastu igoera erabakitzeko.

Horrela gastu publikoa diziplinatu nahi da, egoera ekonomikoa hobea zein okerragoa dela ere; helburua da aurrekontuetako sail sozialak gehitzeko aukera galaraztea. Zerbitzu publikoak merkantilizatu nahi dituzte, oinarrizko beharrizan sozialen estaldurarekin negozioa egite aldera. Horrenbestez, krisiaz baliatu ziren mekanismo berriak ezartzeko, zertarako eta politika neoliberalak, doikuntza eta murrizketak etengabe aplikatuko direla bermatzeko; halaber, atzera egitea ere eragotzi nahi da.

a) Gastu-araua Kongresuan EAJren botoari esker atera zen aurrera, eta Eusko Jaurlaritzak berretsi egin zuen espainiar Gobernuarekiko akordioan

Irizpide horiek zertan islatu dira datorren urteko aurrekontuetan? 2017ko uztailaren 11n EAJ beharrezkoa izan zen espainiar parlamentuak onar zitzan instituzio guztien 2018ko aurrekontuak baldintzatzen dituzten hainbat erabaki; Hego Euskal Herrikoak ere hor sartzen dira. Egun horretan zer onartu zen?

- Administrazio guztiek derrigor bete beharreko defizit publiko maila: 2018an autonomia-erkidegoen defizitak ezin izango du BPGaren %0,4 gainditu. 2019an muga hori %0,1ekoa izango da, eta 2020an ezin da defizitik sortu.
- “Gastu-arau” delakoak finkatzen du 2018an “Administrazio zentralaren, Autonomia-Erkidegoen eta Tokiko Korporazioen gastu konputagarriak ezin duela %2,4 gainditu”, kopuru nominaletan. Aurreikusitakoaz gaindi dauden sarrerak oso-osorik zor publikoa murrizteko erabiliko dira. Hots, 2018ko aurrekontuen hazkundeari muga ezartzen zaie.

Aurrekontu-marko hau egun batzuk geroago, uztailaren 19an, “hitzartu” zen Eusko Jaurlaritzaren, Foru Aldundien eta espainiar Gobernuaren artean. Egundik aurrerako akordioan EAEko instituzioek hitz ematen dute gastu-araua beteko dutela eta men egingo diotela defizit eta zor publikorako ezarritako mugari.

Akordio hauen ondorioz, Eusko Jaurlaritzaren 2018rako aurrekontu-proiektuak ez du baliabide ekonomiko gehiago bideratzen bere sailetara, ogasunen diru-bilketa haziagatik ere. EAJren botorik gabe muga horiek ez ziren aurrera aterako. Eusko Jaurlaritzak ez ditu ukatu; kontrara, Rajoyren gobernuaren adostu du aplikatu egingo dituela. Beraz, oinarrizko akordio bat dute: aurrekontu-politika honelakoa izan behar da.

b) Gastu-araua, euskal erakundeek aurrekontuak erabakitzeke duten ahalmenaren aurkako eraso zuzena

Esan izan da Ekonomia-Iltunak hainbat bertute baduela, besteak beste euskal erakundeei eskaintzen diela diru-sarrera nahikoak izateko aukera, beren gastu publiko maila finkatzeko.

Haatik, gastu-arauari buruzko akordioek oso bestelako markoa taxutzen dute, administrazioei kendu egiten baitie aurrekontu-politika erabakitzeke ahalmena. Praktikan Rajoyk esaten du Eusko Jaurlaritzak, Foru Aldundiek eta Udalek aurrekontua zenbat hobetu dezaketen. Hortaz, aurrekontuei dagokienez ez dago autogobernurik. Diru-bilketa ondo ez doanean murriztu beharra badago, eta hazten denean gastua gehitu ezin bada, zer abantaila ematen du Ekonomia-Iltunak aurrekontuak hemen erabakitzerakoan?

Gastu-arauaren aldeko jarrera ezin da autogobernuarekin uztartu. Eusko Jaurlaritzak azaldu egin behar du zer dela eta babesten dituen aurrekontu-ahalmena zapuzten duten erabaki politikoak.

II- 2017KO ITXIERA AURREIKUSPENA: AURREKONTUAN JASOTAKOA BAINO GASTU TXIKIAGO, SARRERA HANDIAGOAK ETA 478 MILIOI EUROKO SUPERABITA

EAEko ogasunak aurten espero baino diru gehiago ari dira biltzen:

- Finantzen Euskal Kontseiluan urriaren 11n egin zen diru-bilketa estimazio eguneratua 14.367,7 milioi euro izan zen (hasieran aurreikusitakoa baino ia 900 gehiago).
- Kopuru horretan sartzen dira, EAEko instituzioen arabera, ohiz kanpoko 600 milioi euro, datozen urteetarako kontsolidatu ezin direnak, Rajoyren gobernuarekin sinatutako akordioen ondorio.

- Diru hori gabe 2017rako aurreikusitako diru-bilketa 13.767,8 milioi euro lirateke, hasieran espero zena baino 270 milioi euro gehiago (hau da, 2016an bildutakoa baino %6,3 gehiago).

Diru-bilketa handiagoa izateak ez du eragin 2017ko gastua gehitzea. Aitzitik, 2017ko aurrekontu-itxieraren aurreikuspenaren arabera (hau 2018ko aurrekontu-proiektuarekin batera doa), aurten Eusko Jaurlaritzak hasieran aurreikusitakoa baino 400 milioi gutxiago gastatuko du. Gastu txikiagoa batez ere AHTren ordain aurreratuari eta zorra kitatzeko sail bati dagokio.


Beraz, 2017an Eusko Jaurlaritzak superabit handia izango du. Oraingo kitapen aurreikuspenaren arabera, superabita 478 milioi eurokoa izango da.

III- DIRU-BILKETA, 2007KOAREN PAREKOA. HAMARRALDI GALDUA

Diru-bilketan gertatu den hazkundera handia izanagatik, duela hamar urteko maila berreskuratu da, 2007koa alegia. Horrek esan nahi du hamarraldi bat galdu dela; epe honetan aurrekontu murrizketak egin dira eta zor publikoa hazi da; horrek Eusko Jaurlaritzari eragotzi egiten dio beharrian sozialei erantzun egokia ematea:

- 2017rako aurreikusitako diru-bilketa 2007koa baino handiagoa den arren (13.771 milioi euro), instituzioek aitortzen dute hori izango dela ohiz kanpoko 600 milioi euro sartuko direlako. Diru hori gabe 2017rako aurreikusitako diru-bilketa duela hamar urtekoaren parekoa da.
- 2017rako EAEko BPG balioespena 74.462 milioi eurokoa da, 2007an ekonomiak sortu zituen 67.893 milioiak baino %10 gehiago. Kontua da aberastasunaren hazkundera hori ez dela diru-bilketan islatu.
- Horrenbestez, itunpeko zergen ondoriozko presio fiskala 2018an BPGaren %18,52koa izango da, 2007ko %20,29a baino dezente apalagoa. 2018an itunpeko zergengatik presio fiskala 2007koa balitz 1.375,2 milioi euro gehiago bildu beharko lirateke.
- EAEko presio fiskala duela hamar urte Europako azken postuetan zegoen; artean aldea areagotu egin da, eta horrek eragin zuzena du ongizate-estatuan, berau EBko beste herrialde batzuetakoa baino askoz gutxiago garatu baita.
- Azken hamar urteetan diru-sarreretan zulo handia sortu da. Sarrera txikiagoek bi ondorio izan dituzte: Aurrekontuetan egin diren murrizketa anitzak eta zorpetze publiko gero eta handiagoa. Eusko Jaurlaritzaren zorra gehitu da sarrerak urriagoak izan direlako, ez gastua hazi delako.

Itunpeko zergen sarrerak eta zor publikoaren gastua BPGarekiko (%). EAE 2007-2018



Iturriak: Eustat, Eusko Jaurlaritza

Beraz, aurrekontu-politikaren bilakaera hain negatiboa izan bada, Foru Aldundiek eta Eusko Jaurlaritzak hitzartu eta aplikatu izan duten zerga-politikaren ondorio da: Pribilegiozko tratua errenta altuei, enpresei eta kapitalari (zerga jaitsierak eta iruzur fiskalaren jazarpen ezdeusa).

IV- 2018KO AURREKONTUA, TANKERA BEREKOA

2018rako aurreikusi den bilakaerak egoera areagotu egingo du:

- Espero da ogasunek 2017ko antzeko kopurua bilduko dutela. Zehazki, aurreikusten da EAEko ogasunek 14.391 milioi euro biltzea, alegia, ia-ia 2017ko kopuru berbera. Goian aipatutako 600 milioiak aintzat hartuko ez balira, 2018rako diru-bilketa %4,5 gehituko litzateke.
- Eusko Jaurlaritzak aurreikusi du 2018an zorra ordaintzera 1.346,7 milioi euro bideratuko dituela, hau da, bere aurrekontuaren ia %12. Beraz, zorraren ordaina 2018an aurten baino 300 milioi euro handiagoa izango da. Bilakaera epe luzeagoan aztertuz gero, emaitza are ikusgarriagoa da: 2009an zor publikoa ordaintzeko 83,6 milioi euro besterik ez ziren erabili, Jaurlaritzaren aurrekontuko %1 baino gutxiago.

Zor publikoko gastuaren bilakaera eta zor publikoaren pisua guztirako aurrekontuan. EAE 2007-2018

	2009	2010	2011	2012	2013	2014	2015	2016	2017	2018
Zor publikoa (€)	83,6	198,0	312,9	364,8	412,9	724,9	911,2	773,0	1.036,2	1.346,7
Zor publikoa / Guztirako aurrekontua (%)	%0,8	%1,9	%3,1	%3,7	%4,5	%7,4	%9,1	%9,7	%9,7	%11,9

turriak: Eustat, Eusko Jaurlaritza

- Eusko Jaurlaritzaren benetako ahalmen ekonomikoa analizatu ahal izateko aurrekontutik bi sail kendu behar dira: zorra ordaintzekoa eta aurrerago espainiar Gobernuak kitatu behar dituen obren aurrerapenari buruzkoa (AHT eta Hego-Burdinbide Saihesbidea). Beraz, Eusko Jaurlaritzak 2018an bere sailetarako 9.978 milioi euro izango ditu, hots, aurtengoarekiko izoztuta geratuko da (7 milioiko aldea, %0,06).

Eusko Jaurlaritzaren aurrekontu-proiektua, AHT eta zor publikoa kenduta (€)

	2018
Guztirako aurrekontua	11.486,4
AHT aurrerapena	161.3
Zor publikoa	1.346,7
Guztira, ken AHT eta zor publikoa	9.978,2

Iturria: Eusko Jaurlaritza

Ondorioz, 2018ko aurrekontu-proiektuak izoztu egiten ditu gobernuaren berariazko eginkizunetarako sailak; lehentasuna ematen dio zorra ordaintzeari, eta baztertu egiten du Foru Aldundien diru-sarrerara handiagoak baliatzeko aukera. Hartara, 2018an Jaurlaritzak berriro superabita izango du, baina beharrian sozial larriak ez ditu estaliko.

V- EUSKO JAURLARITZAREN GEZURRAK AURREKONTUAREN INGURUAN

Propaganda egiteko Jaurlaritzak, hedabide publikoen babesarekin, bere estrategia hiru ideiatan oinarritzen du. Azter ditzagun:

a) Informazio gardena

Eusko Jaurlaritzak, ostera ere, bere propaganda kanpaina antolatu du herritarrei bere aurrekontua zein ona den saltzeko. Kanpaina egiteko datuak era interesatuan ematen ditu. Gainera, Gobernu-kontseiluak proiektua erabakitzen duen egunean (urriaren 24an) soilik datu bakan batzuk ematen dituztela ezagutzera, Jaurlaritzak nahi dituenak, eta nahi duen moduan. Ia astebetetz, urriaren 30era arte, ez da beste daturik ematen. Deigarria da hedabideek eta beste indar politikoek jokabide ilun eta antidemokratiko hau ontzat ematea.

Beraz, emandako informazioa partziala eta interesatua da; gainera, aurrekontuaren edukia ia astebetetz ezkututzen dute. Honek ez dauka ezer gardentasunetik.

b) Aurrekontuetara gero eta diru gehiago bideratzen da; ahalegina handiagoa da

Saldu nahi izan diguten ideietako bat da aurrekontu hauetarako diru asko jarriko dela: "historian izan diren aurrekonturik handienak".

Hasteko, aurreko urtekoa baino aurrekontu handiagoa izatea ez da inolako meritua. Esaterako, pentsioen %0,25eko igoera benetan erosteko ahalmena murriztea eta pentsiodunak zigortzea da. Halaber, kontutan izan behar da zinez zer esaten duten historian izan den "aurrekonturik handiena" aipatzen dutenean.

Ezen eta diru gehiago izango al du Jaurlaritzak eskura bere eginkizunetarako (osasungintza, hezkuntza, etxebizitza-politika, Ertzaintza, gizarte-prestazioak, administrazioarentzat lan egiten dutenak...)? Erantzun laburra ezezkoa da. Sakonagoa, berriz, aurrekontu honekin arlo publikoak ekonomian duen presentzia mailaka gutxitzen ari direla; gero eta eremu gehiago merkatuaren menpe ari dira uzten.


Erantzun laburra goian aipatu dugu. 2018rako aurreikusitakoa, Trenbide-Sare Berria eta zorraren ordaina kenduta, guztira 9.978,2 milioi euro dira:

- 2017an baino 6 milioi eskas gehiago (%0,06 gehiago).
- Sail hauek 2009an bideratu zen zenbatekoa (10.170,9 millones) baino ia 200 milioi gutxiago.

Erantzun landua are gordinagoa da, eta urtebetean gertatzen dena gaintzen du. Azken urteetan Eusko Jaurlaritzaren pisua ekonomian zeharo arindu da. Jaurlaritzaren berezko eginkizunak finantzatzeko erabiltzen den aberastasunaren (BPGaren) zatia 2009ko %15etik 2018ko %12,8ra pasako da.

Hau da, Eusko Jaurlaritzak 2018an bere sailen esku jarriko balu 2009an jarri zuen aberastasunaren zati bera, aurrekontua atal horietan erabaki dena baino 1.709 milioi handiagoa izan beharko litzateke.

Gastuaren bilakaera, AHT eta zor publikoa kenduta (BPG%). EAE 2009-2018



Beraz, agintarien diskurtso triunfalistak iritzi publikoari sinestarazi nahi dio aurrekontuetan gero eta ahalegin handiagoa egiten dela, baina benetan etengabeko gainbehera ari da gertatzen. Lehenago ere arlo sozialetan defizita izugarria zen, baina denbora pasa ahala askoz handiagoa da.

c) Aurrekontua soziala da

Aurrekontua soziala izango da gizartearen beharrezkoak asetzen baditu. Zerbitzu publikoetarako behar beste baliabide (gero eta gehiago, aurrekontuez ari baikara) jartzen bada; etxebizitza izatea bezalako oinarrizko eskubideak bermatzen badira; gizarte-prestazioen maila hobetzen bada...

Bere eskumenak garatzeko gero eta aurrekontu txikiagoa bada ezinezkoa da aurrekontuak sozialak izatea.

Urtero errepikatzen den propaganda ofizialak dio “aurrekontuaren %77 gizarte-politikei dagokie”. Batetik, datua ez da zuzena, kalkulatik kentzen baitu zorraren ordaina, urtez urte handitzen ari dena. Baina are engainagarriagoa da beste hau: Eusko Jaurlaritzaren eskumen nagusiak osasungintza eta hezkuntza dira; beraz, harrigarria litzateke aurrekontuaren zati handiena gai ez sozialetara bideratzea.

Sakoneko auzia ez da aurrekontuaren zenbateko zatia bideratzen den gizarte-politikara, baizik erabakitzea ea politika horietarako nahikoa baliabide dagoen ala ez. Eta erantzuna argia da: ez. Orain arte ikusi dugu, eta ondoren ere egiaztatuko da.


VI- Aurrekontuaren analisi zehatzagoa

Behin konturik orokorrenak aztertuta, goazen ikustera aurrekontua sektorekako politikan nola bilakatzen ari den.

a) Osasunerako aurrekontua BPGarekiko gero eta txikiagoa da

2018an osasunera bideratu nahi den zenbatekoa 3.671,4 milioi euro dira, hots, 2017ko itxiera aurreikuspenarekiko %1,5eko igoera eskasa.

Honenbestez, Eusko Jaurlaritzak Osasunera bideratuko duen aberastasunaren zatia %4,9a da, 2017an baino hamarren bat gutxiago. Areago, 2009tik hona jaitsiera handiagoa da, ekitaldi hartan Osasuneko gastu publikora BPGaren %5,2 bideratu baitzen. Bilakaera negatibo horri buelta emateko Osasunera bideratu beharko lirateke 2018ko aurrekontu-proiektuan jarri direnak baino 233 milioi gehiago..



b) 2018rako Hezkuntzarako aurrekontua 2009koa baino 108 milioi txikiagoa da

Aurrekontu-proiektuan Hezkuntzarako 2.716,8 jarri dira, 2017ko itxiera aurreikuspena baino 45 milioi gutxiago; honek esan nahi du %1,4 moztu dela.

Jakina da Hezkuntzan era guztietako murrizketak aplikatu izan direla; hori agerian uzten du datu batek: 2018rako aurreikusi den zenbatekoa 2009ko gastu erreala baino 108 milioi txikiagoa da.

Arlo honetarako jartzen diren baliabide ekonomikoen murrizketak hezkuntza-tarte guztiei eragiten die (Haur Hezkuntza, Lehen Hezkuntza, Bigarren Hezkuntza eta Unibertsitatea); hau erakusten du ondoko grafikoak.


Hezkuntzako gastua (€). EAE 2017-2018

	2017	2018
Haur eta Lehen Hezkuntza	964,2	956,7
Bigarren Hezkuntza eta Lanbide Heziketa	1.003,0	967,6
Unibertsitatea	323,2	319,6
Hezkuntza guztira	2.761,8	2.716,8

Iturria: Eusko Jaurlaritza

Azkenik, deigarria da hezkuntzako gastu publikoak aberastasun osoarekiko galdu duen pisua: 2009ko %4,2tik 2018ko %3,5ra erori da. BPGaren %3,5tik %4,2ra pasatzeko 2018rako Hezkuntzako aurrekontura 521 milioi euro bideratu beharko lirateke.

Hezkuntzako gastuaren bilakaera (BPG %). EAE 2009-2018



Iturriak: Eustat, Eusko Jaurlaritza


c) Europar Batasuneko azken postuetan Osasuneko eta Hezkuntzako gastu publikoari dagokionez

Europa mailan osasunean eta hezkuntzane giten den inbertsioa alderatuz gero -honetarako 2015eko datuak erabili behar dira, dauzkagun azkenak- agerian geratzen da EAEn bi arloetan dagoen gastu publikoa urria dela.

Horrenbestez, osasuneko gastu publikoa EAEn BPGaren %5 besterik ez zen; aldiz, EB-28ko batez bestekoa %7,2koa da, eta esaterako Frantziak %8,2 bideratzen du. Beraz, EAE EB-28ko azken postuetan zegoen; sei estatu baino ez daude atzerago: Zipre, Letonia, Errumania, Grezia, Luxemburgo eta Polonia.

Gastuan dagoen alde hau BPGaren 2,2 puntukoa da; europar batez besteko mailara iristeko EAEn aurrekontu-proiektuan jarrita dagoen zenbatekoa baino 1.709,3 milioi euro gehiago gastatu beharko litzateke 2018an (aurreikusitakoa 3.671,4 milioi euro da).

Osasuneko gastu publikoa (BPG %). EB-28, 2015




Iturriak: Eusko Jaurlaritza, Eusko Legebiltzarra, Eustat, Eurostat

Hezkuntzako gastu publikoa, berriz, 2015eko BPGaren %3,7a izan zen. EB-28an batez besteko gastua %4,9koa zen; areago, Danimarkak %7,1 bideratu zuen. EAE EB-28ko azken postuan zegoen, Irlandarekin batera; Errumania zen atzerago geratu zen estatu bakarra.

Batez besteko gastuan EBren eta EAEn artean dagoen 1,2 puntuko tartea 934,2 milioi euro dira. Alegia, datorren urterako hezkuntzako aurrekontuan jarritako 2.716,8 milioi euroei 934,2 milioi euro gehitu beharko litzazkieke.

Hezkuntzako gastu publikoa (BPG %). EB-28, 2015



Iturriak: Eusko Jaurlaritza, Eusko Legebiltzarra, Eustat, Eurostat

EB-28an osasunera bideratutako BPGaren zatiarekin parekatzeko EAEn gastu publikoa 1.797,8 milioi eurotan gehitu beharko litzateke. Hezkuntzan batez besteko maila europarrera iristeko 968,3 milioi euro gehiago lirateke.

d) Gizarte-prestazioetan oraindik murrizketak aplikatzen dira

Gizarte-prestazioetan ere murrizketak ari dira aplikatzen oraindik, kasu guztietan gainera:

- 2012an ezarri zen %7ko murrizketari eutsi zaio gizarte-prestazio guztietan. Kontziliaziorako laguntzak, zeintzu 2017an salbuetsita geratu ziren PPrekin aurrekontuen inguruan izan zen akordioa medio, berriro murriztuko dira.
- DBEaren zenbatekoa %1,5 besterik ez da igoko. Gogoratu beharra dago DBEk aurreko puntuan aipatutako %7ko murrizketa ez ezik beste %7 ere moztu dutela, 2017an ez delako lanbidearteko gutxieneko soldataren igoera aplikatu. Bestalde, Eusko Jaurlaritzak 2018an DBEa berriro erreformatzeko asmoa du; dagoeneko iragarri du atzerapauso handiak izango direla, esaterako etxebizitza bakoitzeko DBE bakarra jasotzea.
- Gizarte-Larrialdietarako laguntzak (GLL) bere hortan mantenduko dira, 27 milioi eurotan.
- Berriro ezarriko da Etxebizitzarako Prestazio Osagarria jasotzeko aukera kentzen duen Xedapen Gehigarria; hau Etxebizitzarako Prestazio Ekonomiko berria arautzen denean gertatuko litzateke. Gogoratu beharrekoa da azken prestazio honen dekretu-zirriborroa gauzatuko balitz etxebizitzako gizarte-prestazioak jasotzeko aukera zeharo mugatuko litzatekeela.
- Etxebizitzarako prestazioen gehienezko zenbatekoak berriro izoztuko dituzte, 250 eurotan.

e) Etxebizitzarako aurrekontua 2009koa baino 90 milioi txikiagoa da

Etxebizitza politikari garrantzi handirik ez zaio ematen; beraz, herritarrei bizileku bat izateko aukera bermatzeko politikarik ez da egin nahi. Hau islatzen da 2018rako Eusko Jaurlaritzaren aurrekontuan sail honek duen tamainan: 127 milioi euro; 2017ko zenbatekoa baino 5 milioi gehiago dira (%4), baina 2009an 90 milioi gehiago jarri ziren (217,4).

Etxebizitzako gastua (€ y BPGaren %). EAE 2009-2018

	2009	2010	2011	2012	2013	2014	2015	2016	2017	2018
€	217,4	182,6	123,0	146,2	125,7	107,1	99,8	107,6	122,1	127,0
% BPG	%0,32	%0,27	%0,18	%0,22	%0,19	%0,16	%0,14	%0,15	%0,16	%0,16

Iturriak: Eusko Jaurlaritza, Eustat

f) Negoiazio kolektiborako eskubidearen ukapena: Rajoyk erabakitakoa aplikatzen da


Eusko Jaurlaritzaren ardurapean dauden langileen baldintzekiko ere politika kontinuista da:

- Soldata igoera gehienez %1,5ekoa izango da, betiere Estatuko Aurrekontu Orokorretan hala erabakitzen bada.
- Itzarrirako ekarpena berreskuratzen arren, bere garaian murriztu zena baino txikiagoa da.
- Negoiazio kolektiborako eskubidea ukatzen da oraindik. Lan-baldintzak gobernuak aldebakarreko erabakiz ezartzen ditu.

g) Euskararen pisua, gero eta txikiagoa

2018an euskara sustatzeko sailerako 107 milioi euro aurreikusi da, aurten baino 2 milioi gehiago. Haatik, BPGarekiko pisua gero eta txikiagoa da: orain %0,0013an dago.

Euskarako gastua (BPGaren %). EAE 2009-2018



Iturriak: Eusko Jaurlaritza, Eustat